

31. Sacra capreae pelle indutus, patris arcu incantato instruebatur; neque solum in orbe terrarum pater ejus unicus erat rex, sed ille etiam unicus arcipotens.

32. Ut vitulus, tauri ætatem attingens, ut elephanti pullus, ad elephanti adulti statum accedens, sic RAGHUS, ordine e pueritia adolescentiam ingressus, alebat corpus firmitate sua pulchrum.

33. Deinde, statim post solemnem crinium tonsuram, pater ejus matrimonii caerimoniam peregit; atque principum filiae, illum maritum optimum adeptæ, splendebant sicut DAKSHÆ filiae, tenebrarum fugatori nuptæ.

34. Juvenis RAGHUS, brachiis longis, robustus, pectore januae simili, et lata cervice præditus, corporis præstantia patrem superabat, sed modestia sua illo inferior videbatur.

35. Atque tum rex, qui gravissimum imperii onus, per longum tempus ab ipso gestatum, sublevare voluit, filiumque et indole et institutione modestum vidit, juvenem imperii socium nominavit.

36. Felicitatis dea, virtutum amans, priorem suam in rege sedem relinquens, partim in eum, quasi in domicilium regis juvenis nomine notatum, ingressa est, velut a loto adulta in lotum nuper ortam.

37. Ut ignis vento, auriga suo, ut sol nubium discessu, elephantusque temporum fissione, sic rex filio suo insuperabilis evasit.

38. Hoc arcitenente, una cum ordinis regii juvenibus, equis sacris custodiendis præfecto, rex, INDRÆ similis, centum sacrificia, uno deficiente, peregit sine impedimento.

39. Tum vero INDRAS, corpore occultato, coram custodibus illis arcitentibus, abripuit equum, sacrificii caussa a sacrificio solute emissum.

40. Juvenum caterva, extemplo præ animi dejectione inops consilii, attonita stetit, cum NANDINIS, VASISHTHÆ vacca, cujus præstantiam audiverant, sponte accedens conspiceretur.

41. DILÍPÆ filius, honoratus a bonis, postquam oculos suos puro liquore, e membris illius manante, inunxerat, res sensibus occultas etiam videndi copiam accepit.

42. Viditque ille, ab hominum deo oriundus, orientem versus deum mon-